

曾忠襄公書札

曾忠襄公書札

卷之五目錄

復李筱泉觀察

與閻丹初

復唐桂生

與黃南坡

復黃南坡

致嚴渭春中丞

復郭筠仙郭意誠

與劉霞仙

復劉印渠中丞

復蔡少彭

復彭盛南

與李少泉

與左季高

致唐義渠

與楊厚菴

復黃南坡

復左季高

復黃南坡

復李筱泉觀察

與廉善泉

復郭意誠

與魏柳南

復黃南坡

復陳餘菴

復郭意誠

復黃南坡

與左季高

復馮樹棠

復廉善泉

與楊厚菴

復胡宮保

復黃南坡

復李筱泉

復毛寄雲方伯

復許仙屏

復胡宮保

復多禮堂

與許仙屏

復劉印渠中丞

復彭雪琴

復閻丹初

復楊厚菴

與劉魯岩

復郭筠仙

復郭意誠

復黃南坡

復趙玉班

復李希菴

復曾佑卿

與許仙屏

與多禮堂

復劉潔齋

與黃南坡

復任松樓

致黃南坡

復黃少鵬

復都直夫

與多禮堂

復蔡瑞菴

復趙梅卿

復黃南坡

與李少山

致李希菴

復趙玉班

致喬鶴儕

復朱步卿

復劉潔齋

復魏柳南

復朱堯階

與萬麓軒

復隋龍淵

復羅旋吉

致沈幼丹

曾忠襄公書札卷五

復李小泉觀察

十月二十六日肅布一函並請代刷得勝愛民歌三萬餘部計
日內可達台鑒頃奉十月二十四日惠書誦悉種切方伯惠解
之款想日內可到其續撥銀二千兩承委魏柳南買米運營感
荷無似粵東股匪竄擾河口一帶江省之東流牙釐不免減色
近聞左軍在貴溪殺賊二千餘人有此大創此股當易了之閣
下奉辦團練之命仰見聖主知人善任慶賀無似祁門危
而復安實爲至幸陳餘庵鎮軍率所部七千人已抵黃口磯二
十九日來弟處小住一宿精明爽朗體用兼備不愧將才楊軍

門拔之於危難之中可爲國家紀得人之慶初一日仍回黃石磯須俟章門餉項棚帳解到乃可率所部進駐香口一帶也陳君旬內當赴祁門一行南岸添此勁旅可與鮑張左諸軍同收戰勝攻取之效惟陳軍飢餓數月甫脫虎口不獨待哺嗷嗷卽鍋帳亦一無所有長公前請方伯撥解該營各款計已籌解矣以後之餉源尙望老兄與方伯設法籌濟以哺飢軍則感激不僅陳君也四眼狗迭經多李兩軍痛勦於二十八日一戰殺賊尤多追勦廿餘里將賊之散營盡行焚燬奪獲騾馬器械無算經此次痛創之後逆賊必膽寒矣並此附告以慰盡懷前寄令弟等楹聯不過潦草應命乃承齒及殊汗顏也

與閩丹初

十三日肅布一面計呈台覽十四奉初八日惠書敬悉一切前承賜解之礮位實爲利器今復倣粵東製法以炸礮爲子鑄二千斤大礮以奉轉之法良意美欽服無似查安慶長濠距城遠近不等亦有相去二三四里者尙可擇扼要之處修築礮臺其子亦可入城也至國荃前攻吉州之時蒙耆中丞解來木壳大礮然未十分得力初不過使賊驚而後亦相安也辱承詢及並以奉聞來示已碾米二千石日內委解感荷無旣第此項米價若干祈預爲示知以便發給各勇爲禱承念敝軍艱窘其所以維持挹注者無微勿至而鄙人從事皖垣不能速圖克復攻堅

無術軍餉久縻抱歎萬分建德彭澤爲賊阻滯北岸與祁門不通文報已十日彌深焦灼時屆歲暮腊月二十日以前總望有鉅款到營乃可度歲伏求諸君子格外關垂是爲拜禱無厭之求尙祈亮之

復唐桂生

自建德陷後未得祁門消息心甚懸懸頃接仁兄密函及家兄信件藉悉一切貴軍進攻建德計已得手此間本擬派兵由北路夾擊因時防城賊衝突且狗逆擊退之後其大股仍踞舒廬一帶並未十分懲創必將復援安慶不得不嚴密待之至陳鎮台一軍克復東流後於十五日撥二千人分守湖口陳軍饑疲

已極昨又撥去二千此時但能緊守東流縣城勢難分剿建德家兄頃有兩致李方伯請其撥五六千人雕剿建德一帶未審其能允行否至分竄彭澤一股於十三日徑撲湖口縣城經彭方伯率水師登陴嚴守以大礮火藥轟擊並奪其雲梯百餘架賊始退去湖口守禦既穩又得陳君撥二千人防守必可無虞楊七麻子大股直竄都昌雖經彭方伯派水師星夜往援第恐該縣無得力陸師殊爲可慮浮梁失陷家兄調鮑鎮台全軍與左軍會剿如能一鼓克復將賊蹤追過皖境先清江右之內地以固祁門之後路則爲至幸否則恐兩股合併旁溢四竄則我軍左顧右盼有剿不勝剿之勢爲可慮耳北岸軍事平穩霍山

之賊已經貞昌各營擊退矣

與黃南叟

初三日肅布一面計達英覽皖賊於初四夜偷渡南岸意圖乘昏黑以襲官軍營壘經嘉字營擊退殺賊頗多並斬其酋首一名現據降賊供稱城中米糧尙足惟柴薪最爲缺乏似非十分窮蹙鄙人惟昕夕嚴防堅忍以俟耳詠帥調貞昌各營與舒都護馬隊會剿霍山之賊當易得手第風雨連朝恐不便於進取也南岸池州之賊竄陷東流厚庵雪琴兩公方率舟師與陳餘庵陸軍於初三日擊退克復縣城乃建德亦報不守也普軍以六千餘人不能禦賊上犯迭次挫敗以長逆焰殊可痛恨幸左

軍在德興續獲大勝軍威甚壯高叟已至祁門數日饒景一路當可無虞矣南岸事每多棘手近因建德失陷文報亦多阻隔殊令人焦灼之至湖南新甯之賊聞由東安經過又係竄江西局面章門南路又不可不早爲安頓耳劉遊擊持牘至尊處乞領之款前蒙允發感不可言此時想已領取辦軍中所需之物矣

復黃南叟

長至日肅布一面計達台鑒十三日接十月二十三日惠書敬悉一切東征局年內即可湊解十萬於餉糈大有裨益然非吾叟以移山之誠扛鼎之力任勞任怨亦不能收今日之效感佩

奚如來示殷殷以敝軍支絀爲念並請時公委員先解三萬關
注極爲周摯第此項銀兩家兄已批定仍照二分一分之例分
解江西湖北糧臺敝處迭經咨達計邀尊覽矣續懇籌撥之二
千餘兩已蒙惠允發給敝營劉遊擊已請領購辦一切也瑣瀆
盡忱感謝無既至抬鎗一項如劉遊擊尙未動身卽請飭發二
百桿交其解來容再報明祁門並備公牘送尊處備案也承示
刻刷請行粵鹽公牘問答誠爲裕餉便民之計欽佩無量皖中
連日陰雨城賊亦無動靜惟探聞城中雖知狗逆爲我軍大創
而去仍昂然不動誓以死守蓋冀南岸各賊之遲以圖解安慶
之圍耳霍山之賊於初五日不戰自走均聚舒廬一帶必另有

詭謀南岸建德之賊分竄彭澤普軍卽四散擄掠絕不抵擋殊堪痛恨彭雪翁已於十二日親率舟師赴湖口防堵部署一切所祝鄱湖饒景一帶不爲逆蹤闌入乃爲至幸耳近得詠帥行知恭邸已奏准夷船至潯鄂通商當吳越未靖之時又多一外夷出入其隱禍恐未有艾也奈何竄陷東安之賊聞已趨零屬之苦株山如能一鼓聚殲庶免貽患鄰近否則恐仍係竄江西之局面也

致嚴渭春中丞

頃接英山來函敬悉閣下開府中州不禁舉手加額爲蒼生慶幸竊維公以命世之雄才負濟時之偉畧鄂中士庶及水陸各

軍其託庇福星者已非一日矣今茲移節大梁撫綏全豫一
德仰明良之慶萬家戴生佛之恩其察吏安民豐功厚澤必更
有度越一時垂流百世者欣慶無量頌禱無量惟敝軍諸荷青
垂一旦節麾遠去殊悵悵耳前竄彭澤之賊於十三日徑撲湖
口縣城經彭雪翁督率水師登陴守禦以大礮火藥轟擊並奪
其雲梯百餘架賊始退去陳鎮台已於十五早由東流撥二千
人分守湖口必可無虞惟楊逆大股經竄都昌雖經雪琴兄派
水師星夜往援而該縣無得力陸軍深爲可慮頃接祁門來函
家兄已派唐桂生總戎率強中湘前左右各營及順營馬隊進
剿建德計十六日必已開仗惟前竄德興一帶之賊已陷浮梁

家兄調鮑軍與左軍會勦諒必得手如能速克浮梁追賊過皖以先清江右之腹地使祁門無後顧之虞方爲至幸家兄面請希翁酌撥五六千人雕剿建德一帶以期速清此股未審希翁能允行否南岸事棘手如此殊令人焦灼萬分也皖中圍剿如常頃接北岸糧臺李令來稟知蒙惠解之二萬九千餘兩業已領到感謝之至惟敝各營均支絀萬分又值年節伊邇之時若非得巨款以爲補苴則斷難度歲務乞閣下與丹翁籌商必求於臘月望前惠濟巨款俾敝軍不致十分艱窘聊以度歲則感激萬萬也倘蒙於十二月十五日前後解到八九萬兩分作度歲之用及新正各勇衣食之資則感戴尤爲不可言宣矣

復郭筠仙郭意誠

十五日肅布一函交便勇帶呈恐稍濡滯十七日奉兩兄賜書敬悉一切堅固自持乃愚人守拙之見重承獎借益覺汗顏耳筠老憂國之勤拳拳楮墨有古大臣舉念不忘君之風明歲欲招致學者躬耕授書固賢者教育英才之意然上念賈生宣室之召必不遠也竄陷東安之賊聞已走零屬之苦株山意叟商中丞飛調各營四面環剿爲一網打盡之謀以免貽江右之犯佩甚佩甚江西此時光景已不堪再添賊耳東征局現解三萬之款長公已照二分一分之案以定咨札鄙人無復睥睨矣南岸分竄彭澤之賊於十三日徑撲湖口經雪翁率水師登陴

擊退十五日陳餘庵鎮軍已從東流分二千人往守必可無虞
惟竄都昌一股雖水師星夜往援未審有得力陸師否長公派
唐桂生帶湘勇七營於十七日進攻建德大戰克復之斃賊甚
多有此一捷頗足寒該逆前隊之膽左軍於初一日克復德興
初三復婺源將賊逐入皖境以清江右肘腋之患免祁門後顧
之虞則著手較易耳昨見午帥寄長公函奏知俄夷有派水師
兵協剿並咪商代運南漕之請此乃戲弄 朝廷有害無利午
帥已剴切復陳極言其不可矣

與劉霞仙

前布各函計次第達覽昨讀老兄與季弟書知台旆已莅省門

運籌帷幄藉保桑梓良深忭慰逆酋彭大順等欲假道入江聞老兄有欲奏留簡帥先清江匪而後入川之議卓見急爲切要如檄調各軍能分投攔截卽將此股於楚境剿滅而免貽江右無窮之患則更妙耳皖南之局勢屢變祁門亦迭經危險幸高叟新軍轉戰於貴溪德興婺源浮梁之間所向克捷祁南賴以保全春霆凱章亦大捷於羊棧嶺爲祁北屏蔽長公調唐副將克復建德旋回老營而南北兩岸之聲氣始通矣湖口經雪翁守定都昌亦爲水師收復賊勢盡趨饒州想高叟與鮑軍必能就近了之皖垣圍守如常四眼狗於前月糾合捻逆大股來援經多李二軍痛創而去遂思變計於昨二十三四日又以大隊

來樅陽雖經水陸各營嚴密扼截該逆已築壘相拒意在必得樅陽以上援安慶弟已派馬步千餘人赴河西駐紮以助聲勢厚翁亦親往部署當可無虞也

復劉印渠中丞

十月二十九日肅復一函計呈崇鑒側聞閣下提師追賊直至楚疆忠勳早冠羣賢欽佩無極近想節麾必已返省垣潯梧一帶經閣下檄調諸軍乘勝勦辦其平定安輯之勲必指顧可俟也弟株守皖垣老師縻餉殊負良友之期望四眼狗自多李兩君擊敗之後復欲從樅陽上援經駐防該處之水陸各營擊退弟亦派千人助之現在水勢日落狗酋令各賊四處擄掠意欲

足有數十日之糧卽分投來援以爲曠日持久之計弟惟督率各將弁嚴守長濠援賊至則穩守以俟多李二軍之夾擊未至則慎密以待之務期坐困此股以抒積憤耳皖南之局勢南雄大股竄及德興浮梁一帶而普軍不振致池太之賊亦上犯都饒欲與浮梁合併維時石埭之賊亦從羊棧嶺而入矣祁中孤懸賊中有四面受敵之勢幸左季翁與鮑張諸軍迭獲大勝祁南之浮景祁北之羊棧嶺均已肅清家兄復遣唐副將克復建德陳餘庵駐守東流彭雪翁力保湖口而後祁門轉危爲安南北兩岸之文報始無隔閡矣鮑軍昨赴景鎮爲高叟夾擊聞都饒之賊已從舊路敗回未審確否楚中之賊不能逞於楚又將

悉數入江從此章門之西南兩路又無甯日長公以江右爲餉源江右不靖則餉地日蹙實東征之憂也南北兩岸之賊併力上犯無非欲急解安慶之圍弟才識庸劣不能速收克復之效殊增愧怍

復蔡少彭

初四日專肅一函計達英盼頃接冬月十六日申刻惠書誦悉一切賊由桂陽竄近崇義則吉南贛之邊圍處處可虞想閣下與在事諸君必早已嚴爲戒備矣聞此賊慄悍異常在楚境時一日夜可行二百里其旗幟盡書同心過江四字是其詭謀逆志早注西江特假道於楚耳此時能折之境外以待楚軍夾擊

則爲至幸否則恐闖入腹地旁溢四出豕突狼奔則又有防不勝防剿不勝剿之患矣惟諸君子早料及此必能擇險駐守上下一心綢繆於未雨之先無俟鄙人之過慮也狗逆於二十六日卯刻又率大隊撲犯樅陽該處水陸各營部署嚴密諒無可虞所慮者水落灘多而練潭一帶處處可渡有非礮船所能扼制該逆之伺隙必在於此弟惟昕夕戒備慎以待之耳

復彭盛南

十四日率泐一面並解來紋銀三千兩以爲貞翁代辦鈎勾船之價計已收到頃接十四夜二更手書知仁字營濠牆業經趕緊加修布置周密甚慰甚慰梅嶺一路昨得韋澤堂來信欲以

仁字營往紮該營就近分守仁字所修之卡比與楊軍門面商
軍門不允囑令仁字營仍守新卡目前不可移動而札調韋營
分紮梅嶺蓋軍門於此間頗有深意兄已函告韋君請其遵照
辦理矣至鮑家冲兩營無論樅陽之壩能否塞成當調回老營
以守長壕兄連日與多楊李三帥籌餉一切尙無成議陳餘菴
鎮軍已到此間也至樅陽之二層壩口卽塞成之後亦須趕緊
幫寬一層以期堅固庶明年春水泛漲時不致潰裂爲一勞永
逸之計卽爲安慶官民無窮之利庶用費之大將來亦可對上
峯百姓也請囑魯岩所有貞翁買來之釣勾八隻均全收應用
之價錢共四千四百二十串文卽請老弟將解來之銀三千兩

照數兌交計有贏無絀也又郭松林等日昨薦來樅陽之釣勾一隻亦請囑魯岩買之但價須稍輕將來壩口塞成卽囑魯岩將此新買之釣勾九隻排比沉下以作二層庶壩脚益寬壩身益穩矣至開支河只准挖寬不許挖深蓋寬則足分水勢而深則水由支河溜去不能多蓄又何以壩爲哉總之此上層之支水壩最爲要緊若二層不能速成則全恃上層得力想魯岩與程富馭等必能竭力爲之也

與李少泉

前月二十一日肅復一函計登台覽粵匪竄至廣豐贛南均形喫緊幸令兄已赴新任必另籌堵禦之法也祁門自老兄旋省

又大經危險始就平穩所祝江右之上游能遏截粵匪不致任其奔突糜爛腹地則長公方可紓後顧之憂餉源不致大匱南岸事庶有起色耳四眼狗於初間又來樅陽十一日之戰經敝仁營與駐防水陸各軍擊敗斃賊百餘名現已部署周密此路當可無虞惟獲僞文狗已求救於李壽成情詞極爲迫切而舒廬一帶之賊與北路捻匪仍糾合來桐計臘底春初必將以全力來援多方誤我連日與厚禮希三帥周履形勢審度賊情擬調陳餘菴四千人來紮集賢關弟穩守濠壘以待多李之夾擊多李則俟賊情之畢露以爲分合庶制人而不制於人耳

與左季高

初十日肅布一函計登英鑒連接祁門來書知雄師由德興而婺源而浮梁轉戰數百里所向克捷祁門之南路賴以肅清佩甚慰甚南岸因普軍不振使賊蹤上犯直入江境幸雪翁守定湖口唐桂生克復建德南北兩岸之氣始通惟都昌被焚饒州失陷想武侯必以就近勦辦與鮑軍夾擊矣尙乞時惠捷音以慰拳拳爲禱皖北軍事如常惟狗逆尙踞舒桐廬一帶必將有復援之舉頃得樅陽來信二十二日賊由義津橋竄至下樅陽約三千餘人李與吾鎮軍已率礮船擊退該處爲入省之咽喉狗逆不能逞志於多李二軍或欲從此路上援亦必然之勢弟已函囑李與吾率水師與韋營嚴密防範並加派戰船梭巡內

湖矣

致唐義渠

頃接英山來函知渭翁一席 天子已屬之閣下爲慶幸者久之竊維方牧乃 國之重臣外寮領袖得賢者爲之通達民情講求吏治其旬宣之化可想而知又豈僅總局出納爲軍 國溥無窮之利哉四眼狗不能逞志於多李二軍乃欲從樅陽上援亦挺而走險之勢幸水師扼截與韋志浚六營相爲倚護廿二三兩日該逆直犯下樅陽均經礮船擊退弟又添派戰船梭巡內湖一帶並函囑李與吾鎮軍與韋營堅守穩擊力遏凶鋒第該逆若日久不退亟肆疲我則韋營恐難獨支弟擬著抽千

人以助其聲威矣

與楊厚菴

昨夜肅布一函計呈台覽頃接李與吾總戎來信知廿四早賊又來撲樅陽且欲偷洩蓮花池之水韋營甚爲喫緊如此情形賊必欲得樅陽以援安慶茲將原函及所訊賊供抄呈台覽弟思狗逆之大隊旣來樅陽若日久不退未審韋營能竭力支持否弟擬從此間抽撥兩營隊伍前赴樅陽然亦祇能於西岸以助聲勢或相機以興壩工未知可動手否水勢日落練潭一帶處處可虞賊不退則壩不可塞樅陽要隘關係安慶非淺目下韋營當喫緊之時想麾下必能設法示以萬全之策若大纛親

往一視則勝於添十萬雄師矣

復黃南叟

十九日裁復一函崑勇賈呈二十二日又奉初三日手書敬悉一切所需抬小鎗昨已備公牘請領乃蒙吾叟先行賜解可謂千里神交心心相印矣感何如之另備公牘咨復並咨明湖北糧臺矣至餉項一節承叟與時公拳拳關注感何可言第此次解款昨奉詠帥行知已飭鄂臺概歸南岸蓋以家兄各軍支絀太甚耳祁門日前危險已極幸左軍連捷於南岸克復浮梁縣城張軍大捷於北而縣縣一帶足資屏蔽唐桂生攻克建德之後亦回老營祁門始轉危爲安矣都昌被陷旋經雪翁派水師

收復惟竄饒州之賊未審近日情形如何想高叟必已會鮑軍夾擊當易克復四眼狗不能逞志於多李二軍於廿三四等日其大隊直犯樅陽雖經駐防該處之水陸各營併力截擊該逆已依山結壘意在必得樅陽以援安慶幸楊厚翁已親往調度必可無虞國荃亦從敵軍派千人馳赴樅陽之西岸以助聲威矣安慶一日不復則南北兩岸之賊必詭計百出以圖解圍鄙人惟嚴密防範堅忍自持耳時公簡放湖北廉訪此老斷不可一日離吾湘想叟與意叟必能求中丞公設法奏留矣此間亦已函託祁門英山設法奏時留湘也曾傳芳先頗出力後便學壞故遠之此次既來仍留營當差可也

復左季高

二十七日奉十八夜復書敬悉一切人才難得然以夾袋中之儲蓄甚富目中物色營官哨弁必甚多加募三千無難也乞早爲之石泉兄有獨當一面之才以之作統領則更足以張軍威矣池賊經雄師擊退已挫其鋒長公昨調鮑春霆與貴軍夾擊此股當易了之所慮者賊趨德興未審江右之防軍尙能極力堵禦不至使闖入腹地否狗逆直撲樅陽者撲犯數晝夜經李韋水陸扼截堅定不搖敝軍亦抽撥馬步千人赴西岸駐紮以助聲勢楊軍門親往調度該逆無隙可乘遂於二十六日傍晚棄壘而遁現踞廿里外之官木橋俟湖水稍落必伺隙而來弟

惟穩守長濠慎密以待之

復黃南叟

頃奉前月十七日復書敬承一是賊由桂陽已闌入江境則後患必不堪設想昨接祁門來函池賊方盡趨景鎮其僞忠王一股亦由婺源上犯家兄調鮑軍與高叟會勦我軍之全力已盡萃於此矣若吉南之邊圉不固賊入腹地江西之兵力必不能遏其凶鋒家兄又添一後顧之患餉絀兵單顧此失彼誠不知何以爲計耳尙祈眾君子憇惠楚中當道速謀援江之舉家兄與高叟拜賜無涯矣狗賊伏處官埠橋一帶尙無動作然來援愈切必另有詭謀也吳舍人本非帶勇之才鄙人亦於詠帥家

兄處言之因別有愆惠者故不能禁回楚募勇其不利於人口宜矣然叟籌發此項亦大費苦心也感何可言

復李小泉觀察

十五日接初二日由泰和惠書敬悉一切賊竄廣豐而平武敗匪亦相距不遠誠慮其勾結爲患幸老兄新履本任籌防籌勦必另有一番部署長公亦可紓後顧之憂不僅南贛軍民共作長城之恃也承囑遴選堪將數百人之材足見賢者選將屬兵爲富強久遠之計佩何如之第敝部中殊少干城之士容再物色報命耳或就近詢之文輔卿懇其在湘中物色二三員亦是一法蓋目前援賊麇至若果係好手則不肯薦出營伍若非稱

心愜意之選則不敢呈送藻鑑之前此等苦衷尙祈諒之弟於
初九日赴樅陽與厚希兩帥會商一切十一日仍回皖營是日
狗逆大隊來撲樅陽經敝仁營與韋營水師營擊退殺賊約二
百餘人現據探報舒廬各處之賊及北路捻匪又均聚桐城狗
逆並求援於南岸僞忠王李壽成計年底新正援賊必併力來
犯厚禮希三帥及陳餘菴鎮軍均至敝營小住數日連日籌商
惟穩守長濠鎮靜以待耳

與廉善泉

連日與楊軍門多都護李方伯籌商一切擬請餘菴鎮軍分撥
數千即日移紮集賢關以防援賊庶兵力益厚戰守均有把握

惟陳軍之窘迫閣下所深知之若不設法接濟何以收飽騰之
效安慶各營亦需米甚多均不能不取於懷甯之畝捐以供此
間之軍食務請閣下即照兩次來札與總局及各局紳董速爲
籌辦並出示曉諭應繳畝捐之家准其折米但限剋日完納於
年內必須解米四千石以濟陳軍三千石濟敝軍其餘三千石
亦望於明正月初十日前後繳齊庶軍士無枵腹之虞得以一
力勦辦援賊穩守堅壘則皖城收垂成之功地方獲安全之慶
實於軍民兩有裨益想閣下前任南陵勤民素著此次與懷邑
紳董認真籌辦必能妥速解繳以濟要需而地方紳民向多急
公好義之士亦必能踴躍輸將共維全局也惟執事其速圖之

拜懇拜懇閣下前云率紳士來此面商一切亦望令其早來則
章程早定收米更快也又該紳等如有以前實在出力最多之
人應以功牌獎勵者亦煩閣下諭馬縣丞及正紳查明開單或
填給數十名百餘名均無不可年底米解齊全則功牌亦可年
內填發也總之地方公事應地方紳董大家速辦此番鼓勵數
十人亦紳士之所樂耳

復郭意誠

連奉前月二十一日及本月初七日惠書誦悉種種簡帥西行
而積欠口糧均行措辦曷若清江匪爲綏靖隣封之舉江靖則
楚安卽他日西征將帥亦可安心入蜀此爲全局所關惟老兄

大力轉旋舍遠圖近是所切禱吳君本非軍旅之材夫人皆知之已將來函轉寄祁門矣此事弟曾痛切陳其不可又請詠帥函致祁門求其反汗而詠曰汗不可反而祁門則曰用人知人最難囑鄙人戒多言弟於是不敢言矣四眼狗尙在樅陽相持不動舒廬之賊與捻匪又聚桐城計臘底春初必大舉來犯厚菴禮堂希菴三帥均至敝營籌商數日而去其大要不外老兄之堅忍謹慎四字擬請餘菴分撥四千人聚集賢關以厚兵力庶援賊來犯戰守益有把握耳南岸建德復有賊蹤大約卽前竄饒景爲左鮑擊回者因此而祁門之信亦須繞道也筠翁恙已全愈否念念營中無長物可寄徒自愧忤筠老憂國之誠篤

擊不可言狀令人仰企無已詠老擬留於湖北軍營蓋思於
天顏有喜時入告耳求賢不得而謂爲介弟阻撓正所以邀
筠出山筠尙其有意乎

與魏柳南

皖賊於十三日經派馬隊截擊斃賊百餘名現與楊多李三帥
商定將菱湖各營分紮左右添掘橫濠以爲團聚固守之計並
請陳餘菴兄分撥四千人紮集賢關以厚兵力如此部署援賊
卽至戰守均有把握矣狗逆尙在樅陽相持如故仁字營現紮
韋軍之前堅修濠卡扼賊來路當可無虞惟吉中各營需米甚
多此間殊難購辦因思吾弟前買之二千石協濟安慶全軍價

值既廉辦理甚速又承吾弟雅意另買數百石維時鄙人以軍
餉久竭妙手空空故未敢允受此米恐其有累吾弟也現在需
米萬緊之時特備紋銀一千兩交蘇游擊同李金州解赴吳城
卽請吾弟查收隨時價代買米五百餘石如該處米價相安則
可多爲買千餘石兄卽由雪翁處兌銀歸楚也如吳城米少或
由附近多米之處辦齊亦可若吳城米多價賤或雪翁處無銀
可兌亦可多買千餘石將來俟此起米解回營之日兄卽由營
中續解銀兩請弟處交清米價領運回營亦無不可

復黃南叟

頃奉客臘廿一日手書及抄示時公稟稿具見諸公之志同道

合見遠慮深敬用佩慰昨得李小泉來函知股匪彭大順等已竄汀洲虔南幸就肅清然吾楚爲賊所垂涎黔粵之寇氛未靖贛南之回竄堪虞防範不可稍疏本實不宜先撥誠能如稟奏畱實爲全局之幸也所論彭胡一節亦見吾叟於獎勵之中仍分輕重先後至公至允委署一層容俟函達祁門請爲畱意吳舍人如果知難而退尙不失爲明哲也皖南之賊其黃文金一股已退石門建德一帶左鮑兩軍去臘爲雨雪所阻不能奮擊開歲晴霽想易了此北岸縱陽之賊見水陸扼截無隙可乘已於初三日午刻焚壘而走計必另尋上犯之路也桐城續到之賊據探報五六萬人月內當有動作也

復陳餘菴

前日據長勝營朱營官稟呈逃勇清單及貴部田參戎所與之信均抄呈覽查田宗祥在長勝營首逃之時並未告假卽貴部田參戎所與朱營官之信亦稱田宗祥擅自離營已深負超拔之意云云是田宗祥之無故倡逃已無疑義又稱現勒令仍回舊所恐野性難馴請勿深究等語是田宗祥現在彪營田參戎並未令其回去亦彰明較著據朱營官面稱田宗祥已在田營充當百長不知確否茲接來示所詢田參戎面稟之詞與其致朱營官之信頗相懸殊查兵勇無故潛逃例有明禁況此次長勝營僅八百人而三日之內所逃之勇遂至六十八名之多若

不澈底根究則彼逃此收該勇等亦無顧忌於軍務大有妨礙而於守濠訊地尤爲遺患不小此弟所以思之焦灼也麾下將軍嚴明不分畛域爲鄙人素所欽佩務希麾下將田宗祥傳訊明確派人送過敝營弟當鞠訊明白卽從寬究辦亦無不可其餘各逃勇聞多投貴部之田姚二營亦希訊明田宗祥並通飭查明派人送來弟處懲辦以免效尤則於軍政均有裨益而於守濠訊地更昭慎重矣是所切禱此次朱營官所開列逃勇名目弟本應用公牘移請尊處查辦因思敝部與貴軍原無彼我之分均可函商辦理且該營逃勇太多一經公牘往還將來必致詳報各憲行文通緝則於朱營官殊有礙也祈曲爲憐之

復郭意誠

頃得客臘手書及筠老復函均已誦悉令嗣以英年入泮可謂
濟美從此扶搖直上其雲程豈可量哉援江之議非深識時務
顧江楚大局不能及此鄙人亦曾以函懇第朱逆一股已趨汀
洲虔南岸暫就肅清恐籐帥終不可畱鼓行而西桑梓如有後
患則殊少將才以禦外侮也來示謂食少體隆夜不成寐此非
衰頹之態乃積年運籌帷幄用心太過之由惟節勞珍攝自勃
勃然如春氣之融和舒展矣安慶橫濠已成樅陽之賊初三日
已棄壘遁去計必另尋上犯之路桐城援賊無動靜內湖水已
稍漲數尺戰船可以梭巡弟亦派馬隊於鮑家冲等處往來巡

哨以助聲威祁門百里之內均安穩如常開春晴霽左鮑計已接仗也

復黃南叟

十四日連奉兩次惠書敬悉一切時老畱南則各局不必更動補益良多籌帥入蜀兵餉皆取之楚中此時江右不靖卽爲吾楚之憂何可舍近圖遠乎惟吾叟與意誠諸君子力主援江之議則大局方有裨益也彭胡所云已轉達祁門矣皖城三面皆水惟西門一隅可挖地道然賊之石牆皆扼要路其護城濠溝寬深五六丈是以無處下手現在狗賊尙屯樅陽與官軍相持不動舒廬之賊與捻匪仍聚桐城其來援必速國荃昨與厚菴

禮堂希菴三帥面商防剿之法總以堅忍慎定爲主擬請陳餘菴鎮軍撥四千人移紮集賢關庶兵力益厚戰守更有把握南岸之建德復有賊蹤係前竄饒景之賊爲左鮑擊回耳

與左季高

聞前擾饒景之賊經雄師與鮑軍擊潰回竄建德此股不足平也惟風雪嚴寒軍行况瘁殊可念耳弟於初九日赴樅陽與厚希二帥面商移敝仁營於韋營之前堅修濠卡以扼該逆之來路十一日狗賊率大隊來撲經各營擊退斃賊約百餘名是日弟亦回皖營矣十三日城賊出數千排列洲上經馬隊出濠擊之斬馘百餘名至是堅伏不出而探報舒廬之賊與捻匪麇集

桐城來援必速厚希禮三帥均至敝營熟商惟鎮定堅忍以待賊情畢露而後分軍夾擊之並請陳餘菴分四千人紮集賢關以厚兵力庶戰守愈有把握耳

復馮樹棠

長公得將伯之助毗贊良多況金石至交戎帷聚首其樂又何如乎鄉孫不願入蜀竟登白簡爲是謀者不免有蹊田奪牛之過至老兄調奏在先必不能過問矣狗賊在樅陽忽無動靜必另有詭謀如天霽數日此間卽移營團聚添挖橫濠蓋東北一隅有菱湖扼截於前賊不能逸如援賊內犯卽可畱作戰場此與厚禮希三帥會商之策也陳餘菴亦於日內可分四千人移

紮集賢矣

復廉善泉

頃接復函具悉一切所有應復事宜條列於左

一懷甯各鄉公同酌議如得畝捐米二萬餘石除各局酌留四千餘石外其餘一萬六千石年內繳四成即可將米六千石應請閣下飭令各鄉局如數繳齊以濟軍需至切至要陳軍來此者係四千人其在東流者亦無米可吃合之則有六千餘人應吃米也弟所統者萬二千餘人伙夫長夫在外亦應吃此米聽閣下照人數分濟可耳

一多都統既札飭各鄉辦米即可將年內所繳之六千石以二

千石應付多軍卽以所得之米價爲各局轉運差費之用而以四千石分解陳軍及安慶各營至李方伯一軍聞係在潛山縣採辦米糧似懷甯可不必籌米濟之也

一懷甯議繳畝捐之米除年內限納四成外其餘六成卽請飭令各鄉局於明年正月內一律繳齊分解成軍及安慶各營毋令延緩愈速愈妙恐後來一聞賊驚民間不辦米繳來也

一各鄉統繳捐米自不便再行採辦使事出兩歧所委有敝營前委馬縣丞赴鄉買米卽請閣下面囑馬君暫行停止以歸劃一懷甯向例每畝捐錢百文米二升今據該紳董等請免捐米每畝捐錢百五十文以資公用應卽准如所請以從民便

一懷甯各鄉已繳畝捐未必概滿五次且當民力凋殘之時一
米一錢務歸實用閣下擬吊查細賬逐款勾稽自是核實辦法
甚善甚善以上各條均請查照施行

與楊厚菴

正封函間接嘉字營武營官來稟特寄呈閱周武兩營紮對岸
而後湖水涸誠恐張家灘及池州之賊冒死併犯對岸則周武
兩營亦甚喫緊其應如何設法保爲萬全之處尙祈軍門熟思
示知俾得預爲布置有所遵循則不僅該兩營之幸也又不知
可能設法添紮二營於中間否原議餘菴兄率四千人來紮集
賢關今餘菴已帶五千人來矣若能紮千人於對岸四營共爲

穩守營壘之計亦未始非良策第此論出之自軍門則餘菴欣然樂從矣弟處合大通之款從廿四日起至今日尙祇濟餘菴六千兩三千串又撥雪翁賞喻凌挖洲河之千串與陳軍又大通米三百餘石而已力盡計窮無法可以籌濟也祈亮之希翁解千二百兩與陳軍昨日已到詠帥又允濟陳軍萬串大約六日內可到也

復胡宮保

頃奉廿七日鈞諭敬悉一切前承撥解之米每石作爲一兩捌錢我公之體恤士卒優渥已極無涯之感激國荃與軍士共之請卽轉飭糧臺照此扣算不敢再有希冀也縱陽壩工據委員

來稟其北岸與中泓深處均已塞成惟南岸水淺處尙畱龍口未合現在水漲數尺必需加浚新河將已成堤埂加高培厚然後合壠等語國荃已札飭懷桐兩縣委員赴各鄉趕催民夫於新正帶赴樅陽分班修築以期迅速成功未審仰託福庇果克如願否雨後稍晴此間已趕修濠牆加浚橫濠矣

復黃南叟

除日接初九十一日惠書敬悉種種借運粵鹽之議爲軍民兩便雅俗共賞家兄必以爲然而遲遲入告者大約以南岸軍事屢形棘手徵調不遑故稍延緩容再催之並求卽與意誠叟商定一面請中丞公出奏更爲快妙也承念敝軍艱窘欲俟粵

鹽定議另請札委赴粵勸捐其所以維持鄙人者無微勿至感何如之簡帥入蜀則楚中之兵餉兩難鄙意仍以先清江匪爲急務想叟與當軸諸公必能力持此議不知簡公心願否也敝營移紮西北後因陰雨連朝橫濠近日可告成舍弟紮東北近據探報桐城之援賊愈積愈多僞輔王楊逆僞忠王李逆亦均有來援北岸之信未審確否總之狗逆情急必挾全力而來月內當有大戰惟慎靜俟之元旦晴明今歲之豐稔已兆於此三吳軍務其大有轉機乎

復李小泉

股匪彭大順等竄入汀州江右南路暫紓徵調之急老兄之福

也現調重兵扼要以防武平及汀賊回竄具見安不忘危之心
敬佩無似承示虔南情形真有餉絀兵單之患然老兄以盤錯
之才求吏治以通民情簡軍實以養勁旅富強之效必可立睹
頌何如之皖南自景賊回竄建德文報不能速達左鮑兩軍已
跟蹤追剿比以雨雪不能行兵開春晴明想易了之弟營自去
臘廿六日移紮西北舍弟事恒亦移駐菱湖之左添開橫濠爲
團聚固守之計陳餘菴鎮軍帶五千人紮集賢關先扼要隘以
爲將來多李二軍夾攻進兵之路蓋從厚禮希三帥之謀也近
據探報桐城之援賊愈聚愈多僞忠王李逆僞輔王楊逆亦均
有來援北岸之信未審確否其樅陽一股見水陸扼截無隙可

乘已於初三日午刻自焚其壘而去計大小缸窰一帶必又喫緊矣

復毛寄雲

客臘奉去冬廿日手函娓娓千言想見治平之功德與規畫之大計令人一讀一快敬佩無似所論蘇藩無借手奏功之地目前之形勢誠然剝極有必復之理亂極卽將治之機况老兄爲戡亂長才負匡時偉略三吳庶士羣引領以望福星之至正不獨長公急呼將伯之助也書至此又讀去臘廿日惠函欣慰台旃已定期東下由英赴祁並可便道來敝營一叙此爲下走之素願惟日夕引企掃榻以俟皖賊蟄伏如常弟營於去臘二

十六日移紮西北舍弟事恒亦移蕤湖之左中添橫濠爲團聚
固守之計並請陳餘菴率五千人紮集賢關先扼要隘以保他
日多李夾攻進兵之路均從厚禮希三帥之謀也縱陽之賊正
月初三日已退官埠橋一帶桐城續到援賊甚多尙無動靜昨
接長公來函環祁百里之內均稱安謐景賊回竄石門建德一
帶左鮑兩軍當春日融和之時想易勦辦也

復許仙屏

頃奉手書猥以歲籥更新吉詞獎借盥誦增慙承示帥君原信
知託購之書二三月可期辦妥慰甚感甚昨接長公來函祁門
之大樸嶺又有賊犯刻下老營戒嚴已派唐桂生前往雕勦惟

祝戰事順利乃無他虞左鮑兩軍追賊至建德界天晴氣朗正好開仗惟謀報青銅復來大股賊萬餘上犯建德乃黃文金乞援者計日內必有大戰也狗逆自樅陽退後聞入桐城其另股屯聚雙河口榆樹嘴一帶有急欲來援之意幸內湖之水稍漲樅陽之壩已成有戰船上下梭巡復派馬隊於南岸游繹以助其勢或足杜此路之窺伺耳

復胡宮保

頃奉十八日惠示深以祁門爲念欲撥希軍守樅陽而以韋軍南渡仰見我公睠懷南岸無任銘感第思皖南已連獲大捷軍事漸有轉機餘菴復率五千人渡江亦足以助聲勢北岸正喫

緊之時希翁一軍爲各路策應之師西而關繫鄂疆東而維持
圍皖之軍斷不宜遽然撥動以兵力論韋軍亦不必南渡也南
岸自左鮑唐大勝之後北岸卽不分兵往助長公亦必諒之矣
北岸之賊欲多方悞我爲同時並舉之計幸我公綢繆未雨該
逆亦必不能逞矣分人南渡之策尙祈我公熟審之

復多禮堂

陳軍所遺牆壘卽當遵示毀平之以杜後患聞擒匪上竄六安
官亭兩河口一帶有窺伺商固羅麻之意幸宮保防範嚴密當
可無虞狗賊專顧桐城計必與各路相約並發使我處處防備
然屢敗之寇終當投首於帳下矣尊處所購羣馬已南來否前

面求老兄爲弟物色幾匹煩於馬到之日早爲畱意是爲至禱
容卽備價奉上請老兄爲我代購也

與許仙屏

初五十六兩佈寸函一由章門一由吳城轉寄計均達覽祁門
自唐桂生初八日大捷逐賊出嶺始轉危爲安初九日鮑左亦
大戰獲勝盡破賊壘軍威爲之一振矣陳餘菴於十九日復率
五千人渡江以助聲勢皖北之狗逆尙踞桐城捻逆有上窺羅
麻商固之意殆欲分道並發使我應接不暇以伺隙而入耳幸
宮保防範嚴密多李皆健者當足以伐賊謀惟二十一日申刻
有洋船一號過此並未傍城安泊已泝流而上矣聞後來尙有

數號從此華夷雜處其後患不可勝言惟祝不與皖逆勾結則垂成之功不致隳於一旦也開春景象維佳山中想多勝趣祈時惠我音書爲幸

復劉印渠中丞

頃奉初三日手翰獎勵逾恒至爲感愧承示越中近狀知下郢已報肅清大軍直搗得郡挾全勝之師犁庭掃穴當如洪爐之燎毛髮矣弟惟日盼捷音俾薌泉一軍裹糧東下共清江皖則不獨嶺嶠土庶羣戴福星卽家兄亦拜賜無旣皖南於初四日賊破大赤嶺而入祁門戒嚴幸唐桂生總戎於初八日迎勦大戰獲勝逐賊出嶺斬馘以數千計初九日鮑軍與高叟勦洋塘

之賊亦獲大捷自是祁門又獲安謐鄱湖一帶均已肅清刻下
鮑軍追賊建德卽爲攻池州張本高叟已回景鎮俟湖南援江
之魏李二軍到齊卽從婺源進攻徽州前來安慶之陳餘菴五
千人亦渡江駐紮東流將來分守建德爲鮑後路聲援此南岸
之部署大略也四眼狗以樅陽嚴扼來路而壩埂已成內湖之
水不竭練潭以下數十里皆戰船梭巡無隙可入卽帶各股匪
退入桐城復糾合僞玕王大股欲分三路來犯並薙髮千餘人
從岐嶺上竄蓋欲擾官軍後路同時並發使我有應接不暇之
勢詠帥已飭各嶺寨碉卡加意嚴防多李與敵軍仍相爲犄角
靜鎮以待耳夷船已來六號從安慶上駛幸未與賊勾結然華

夷雜處後患終不堪設想也

復彭雪琴

頃奉初二夜手書敬悉台旆於月朔還營詠老雖已痊可而元氣過虧深以爲念所祝天相元老俾壽而康則爲中外之福耳畏公移駐東流最爲相宜希翁來書亦以此相勸弟已函達祁門矣王家套釐局經老兄訓示感甚感甚近據降賊供稱城中各頭目均造划船菱湖亦添小划二三十號如三月後援賊不至將從大江逃竄等語此亦意中事也今日得詠帥抄寄各路稟報知前竄中梅河一帶之賊又犯黑石渡諸佛菴等處欲從英山以抄我大軍之後余會亭督率各營分投嚴守詠帥又委

何紹彩助之以扼入英之要路當可無虞如英霍之邊圉守定不致牽動多李之師則桐城一路賊雖多亦無能爲矣又大通局員來函稱下游之賊紛紛擄船南岸有數萬從梁山渡江救援懷桐等語想尊處早有所聞也

復閻丹初

廿八晚手示初三遞到何排單之速也棚帳餉項均蒙於月朔委解感甚感甚承示洋船情形專爲通商而來又得諸君善撫綏之可相安無猜矣頃接詠帥來函賊犯黑石渡諸佛菴等處均經余會亭督各營擊卻之詠帥又派何紹彩率親兵駐土地嶺嚴防以扼賊竄英霍之要隘此路當可無虞惟據大通局委

員來稟南岸有賊數萬從梁山渡河來援懷桐大約卽僞甘王洪逆等也月內計有大戰耳安慶之賊現添小划二三十號據降賊供稱城中各頭目均造划船如三月後待援不至則由大江逸出等語亦意中事也建德經陳餘菴收復已移營守之自此南北兩岸之聲氣復通鮑軍可節節進剿矣

復楊厚菴

元宵奉十四夜手函敬悉一切貴部副左營駐防盆鎮則安慶對岸益可無虞矣來示以菱湖舢板單薄爲慮囑撥一營駐紮湖岸具徵擘畫周詳無任欽佩查菱湖前濠自客臘移營後弟於初二日仍派三哨守之亦以護戰船而杜賊之窺伺也此路

有水陸依輔儘可無虞請釋厘注頃接詠帥抄示長公來函知
賊破祁西大赤嶺而入老營戒嚴而繫鎮糧道亦爲可慮所祝
唐桂生前往雕剿能驅逐出境則爲至幸耳原函抄呈台覽頃
大通委員稟稱距大通十里內外來賊頗多其犯大通者經裴
人杰擊退適貴部彭楚漢率戈船經過該局員請其暫畱數天
以資鎮定人心擬畱其俟賊退後乃行前去伏乞函諭彭營官
多畱數天是爲至荷弟因瑣務紛紜未克趨叩抱歉奚如

與劉魯岩

連日晴明堤埂計加倍高厚此時正喫力之際宜率紳董督民
夫加培不可鬆勁庶遇春霖泛漲之時可免衝突傾瀉之患也

本日程奉箴等來稟以民夫仍請於前限五日之外酌賞錢文
僕已批飭不准蓋樅陽修堤本地方應辦公事且查各民夫有
鄉局每名發錢一百五十文或二百四十文二百文者均於各
鄉畝捐內扣出是此項民夫已給重價若再賞錢文則糜費更
大亦不成事體足下於舊臘來稟從二十九日起雇畱度歲民
夫五百餘名至今正初四日止每日加賞錢一百文除日又加
五十文是民夫一名每日約得錢三四百文在各營哨官所得
薪水以日計之尙不能若是之多將來又作何報銷此項經費
僕費無窮之力提畝捐洲款釐金尙不敷應用若不加節省將
何以爲繼足下與程奉箴等務宜加意撙節一錢得一錢之用

庶將來方好報銷免各憲駁斥耳至局中各匠應裁撤者亦宜及時遣之亦惜費之一端也

復郭筠仙

頃讀初八夜手書敬悉一切公以避人疑忌不欲詠帥陳奏而並不欲一往視之亦操危慮深之意耳然屢讀來書憂國之忱溢於言表固知老兄雖暫爲伏處而濟世情殷終當再起東山共贊中興之業也援賊暫無動靜敝軍堅忍自持不敢稍涉大意以負厚望長公昨寄詠帥函賊破大赤嶺而入祁門戒嚴景鎮之糧道亦爲可慮已派唐桂生往勦所祝軍事順利驅逐出嶺則南岸全局方不爲所動搖耳

復郭意誠

頃奉初八夜惠書藉審台候違和至爲馳企比想頤養德門必已霍然全適矣簡帥西蜀之行恐終不免令卽書法秀勁酷似乃翁非閣下指示弟幾不辨矣皖北軍事狗賊已入桐城其擒匪多回舒六有窺伺英霍之意幸詠公早已綢繆當可無患樅陽之壩已於十一夜合龍現已加高培厚湖水不涸則練潭以下數十里戰船可以梭巡可少省兵力也祁門又形喫緊未審唐桂生雕剿已得手否高叟與鮑軍已追賊入建德界能早清此路亦足以衰賊勢而餘兵力庶不爲所牽綴耳

復黃南叟

頃接初七日手書誦悉一切。竊帥奉 旨催促計已啟行。魏李赴江則章門添一勁旅。第湘中援師四出精銳一空。若不預爲之所。徒恃鎮筓苗兵。吾恐一旦有警。則徵調不遑。緩不濟急。況如來示所云。此二種離鄉。則無益有害乎。逸叟爲撫幕斷不可少之人。渠卽不欲出山。中丞亦當強致之。方於大局有裨。叟於當道處極力主持。關係匪淺。未審逸叟果肯再就而聘之否。亦果能維繫愈殷否。時局日艱。邪正之混淆久矣。屢讀來書。徒增浩歎。東征局每月可解四萬於餉項。深有裨益。祁門有急需之處。自應委員守提。免爲他人中梗。胡太守出力最多。尊函當卽寄祁門也。頃據謀報。援賊麇聚桐城。欲分三路來犯。一由舒霍。

以繞楚軍之後路一由桐城及樅陽並進又有僞玠王洪逆率下游賊數萬大舉來援等語賊情詭譎意在同時並發使我軍應接不暇爲伺瑕蹈隙之謀懷桐之師月內計有大戰耳

復趙玉班

頃奉人日手書敬悉一切簡帥挈黃劉西行而魏李二軍赴江助剿於隣省不無裨益倘桑梓有警則不免兵單將乏之虞然所恃以無恐者以老兄與意叟在耳倘相率而去如家國何此吾楚之安危軍民之屬望皆於兩叟之去留卜之務宜俯念時艱委曲求全斷不可遽存退避之思也承惠輿地五十張已拜領謝謝所刊昭忠祠公啟選詞極當容卽分寄各軍第皖餉支

自是事之書本
卷五
三
絀異常恐難卽日繳指耳

復李希菴

頃奉廿七日酉刻惠書敬悉台旆於今日回營詠帥已復元至
爲歡慰頃接陳餘菴鎮戎函稱建德於廿六日經該軍克復已
拔全隊守之其畱防東流者祇一千五百餘人云云自此祁門
之文報無阻而鮑軍可由張家灘一帶節節進剿矣來示勸長
公宜駐東流具見統南北兩岸之全勢深思而熟籌之卽當以
尊函寄祁門勸其移駐但不知此時情形如何耳城賊於廿八
日出數千人至菱湖邊欲搭浮橋以通石壘之賊經巡湖礮船
擊之斃賊約百餘名此間濠墻已加修堅固如援賊至當穩守

以待大軍之夾擊斷不爲所動搖第祝英霍一帶穩站不搖乃不至分動大纛兵力也

復曾佑卿

廿九日接十四日手翰敬悉一切康郡倚山濱湖非水師不足以資防守閣下莅任未久卽因地制宜爲未雨綢繆之計可謂知所先務矣至永久無斃之法尙希函詢雪帥鄙人於舟師尙未講求故不敢妄爲言之也珂鄉寇盜充斥勦辦良不易易聞齋帥已定期入蜀得此一軍以爲之振興當可收蕩平之效耳皖賊於二十八日出數千人至菱湖西畔欲搭浮橋經水師擊之斃賊約百餘名狗逆糾合各大股屯聚桐城已分股從舒霍

上犯意欲牽制我軍應接不暇而後乘虛而入此賊之詭謀也幸詠帥早飭各碉堡加意嚴防如多李之師不爲牽動則狗逆當可就烹耳頃接陳餘菴鎮軍來函廿六日率師攻克建德已移營守之得此一城則鮑軍可由張家灘節節進剿無後顧之憂矣

與許仙屏

先溫甫兄於三河殉難雖蒙 朝廷優卹尙未建祠請諡中心耿耿恒不自安現與季弟擬俟克城之日各辭獎叙稟請揆帥宮保具奏爲先溫甫兄建立專祠並請諡法庶稍慰逝者之忠魂而弟等亦略盡手足之義也惟呈詞必得大手筆爲之將來

據以入 告方足增先兄泉壤之光而動 聖人之聽茲將奏
摺 諭旨抄呈卽希代製鴻文則存沒均感大德矣老兄散行
文條暢無匹弟所心敬卽乞製散行文爲妙倘握管時不願爲
散體文則乞爲駢體文亦聽老兄興之所至筆則隨之皆絕妙
好辭也弟軍次之中實無暇晷望閣下得此信後三日卽作就
速由柳南處寄營是所感禱

與多禮堂

日前奉到還章敬承一切國荃於二十四日率新募十二營由
皖門解纜初一日抵神勝河因遂至三山夾事恒舍弟營內一
行初三日抵無爲州城隨來之新營舟行二千餘里全未操習

鎗礮而老營守安慶之二千餘人須初十日後乃可拔來計進兵之期當在十五以後矣此十日內國荃當至運漕東關等處布置後路也頃據近處紳士稱有僞侍王黨羽僞對王者名曰洪春元實係九江德化人約有五六萬之多將由太平關過江乃原姓熊後賜僞姓洪去冬僞封對王僞侍王之第一枝能戰之賊云云由江浦一帶到巢縣其前隊數千人則已過江云不知此一枝賊係來守禦巢縣阻我進兵之路否抑係赴廬郡救援狗逆送至柳營以就誅戮乎其確實情形敝處尙未偵探明白惟尊處探報最詳麾下又能預料一切懇祈示知爲禱敝軍新營多過縣旣聞有賊渡江來敵則荃自宜穩慎以圖方不誤

事所有應行進止機宜老兄籌畫北岸全局必已成算在胸凡謀慮所預及者均求記室詳爲錄示則敝軍一路叨受教益多矣

復劉潔齋

接來書知提三千串買米發粥之事已承照辦未抵大通時或派裴人傑發或派張蔡管或交柳君壽田發均聽賢友就近商酌施行總以有實惠及於饑民爲是現在青陽石埭已復各難民可以還定安集及時耕種以圖長久之生理此本應爲之事如有能妥爲施籽種施耕牛不致中間舞弊者僕願提安全官鹽官錢三局共錢三千串交彼斟酌可靠之人迅速行此美事

但不知彼中有如此之公正紳士可靠者否煩我賢友與伊卿兄擇定數人極力行之爲荷如辦籽種辦牛太煩瑣或卽賞以錢文令百姓自買亦一法也總之要有實惠及於百姓杜奸猾侵吞之弊爲妙又三山夾洲邊難民數十萬餓殍載道目不忍睹想夏間餓更甚矣急須稍爲賑濟以安吾之寸心茲備公文提三局錢四千串煩賢友飛速派人赴上游買米解交湘恒營就近發賑以救三山之難民不必定作一批解也或此米未到之先卽一面於前次所買之米內分借一半先行解交湘恒營早爲賑濟亦是一法俟續買之四千串米到再如數扣除可也合共提錢萬串均從百姓身上起見賢友祇報僕處僕再設法

轉報上憲可耳

與黃南坡

初七日由武昌肅寄一緘諒達台覽荃於十四夜抵皖連日與家兄籌商俟敝軍新募各營到齊卽由無爲州運漕進攻巢含以冀通淮揚官軍之氣約二十外卽可啟行李少泉一軍大約俟敝營進兵時始可由間道東下也多軍進攻廬州已破城外之堅壁四座聞上海洋兵與中國聯爲一氣於高橋等處已連獲大捷想可保此要隘矣東征之餉全賴大力維持家兄極爲感激國荃前懇賜解之軍米八千石想已蒙籌畫此次敝軍進取共四十餘營需米甚鉅而安慶以下米價昂貴倍於長沙非

賴吾叟之曲賜垂憐勢將有枵腹之患務乞俯念時艱如數畫解並懇飭押解委員送至下游徑交敝營查收以資接濟而免爲捷足先得是所感禱

復任松樓

連奉十一月十五廿九兩次惠緘知雄師防勦保全江境部署精詳佩甚慰甚都饒一帶真如長城之倚矣皖賊至今負隅不出毫無動靜狗逆於初六日復犯樅陽其鋒更銳經李與吾率水師及韋營扼守穩固弟昨亦派仁字營助守十一日一戰斃賊百餘現在防範嚴密已可無虞所慮者堤工尙未告成應防之路尙多目下正在趕緊堵塞或可冀其成耳

致黃南叟

日前疊寄數緘計均呈覽國荃日來部署一切甚爲碌碌而新勇尙未到齊已定明日率領已到各新營先行東下其後至者並各老營隨後續往因舟楫驟難取齊故不得不分起拔行也大筆代擬興辦廣東釐金摺稿伯兄閱之初恐其地當事者多所阻撓未欲具奏旣而思之刻下東征方急而粵地最爲富饒前議若行於兵餉裨益非小已允爲竄入復奏朱侍御章內入告矣

復黃少鵬

國荃二十日早率師渡江規取金柱關水陸會攻該逆負險死

拒並分枝五六百人過南門外浮橋守北門卡因率軍疾趨太平府北門外破其卡奮力追擊直抵南門湖橋邊其殺賊二三百人賊拆斷浮橋以礮火穩扼南岸我軍克復殘破不堪之府城不能過河是日水師攻打金柱關石壘一晝一夜受傷者不少賊仍負隅如故廿一早敝軍遂繞至馬陰街之上三汊河上泗渡一帶紮營並逼紮南門與賊之湖橋對壘轟打一天派奮勇浮水搶得賊之大浮橋碼頭船三隻又將上泗渡之民船放下二十餘隻爲明早渡河之計是日隔小河相爭此浮橋我軍受傷者亦二十餘人然目擊打傷之賊亦多第料我軍扼此後路不特金柱關可以速得卽取東梁山與蕪湖亦必易得機勢

乃竟如鄙算初更金柱石壘之賊放火水師卽已上岸奪此堅壘馬陰街與三汊河之賊亦相率而遁大半往東梁山去矣因黑夜不便追勦明早卽派隊進攻東梁山知注並聞

復都直夫

月前接奉鈞函敬聆一切前犯淮揚之賊經雄師擊退遁於數十里之外旋據探報仍已渡江而南矣國荃於前月二十日率軍渡江會合水師進規金柱關一帶先以陸師扼紮東梁蕪湖之後路仍合水陸力攻是日克復殘破不堪之太平府城二十一晚水師乘機奪克金柱關東梁山蕪湖國荃率馬步急追三處宵遁之賊萬餘人共計殺斃賊四千有奇溺死無算生擒八

百餘名訊明正法餘均解散矣丹陽鎮之賊亦畏威遁往溧水國荃因審察民情賊情均利在速進遂於二十五日由中大路進兵二十八日駐大定坊離金陵二十餘里初一日派隊奪得秣陵關收降卒數百人解散五百餘人因其地太遠不能往守濱江一路則調守和州之四千人於初一日進兵往紮國荃於初二日派隊至大勝關三汊河以上搭成浮橋紮營抄截大勝關三汊河之後路爲該二處石壘之賊卽於是夜放火而遁經守浮橋之三成隊殺賊數百奪得大勝關三汊河要隘初三日陸師紮營逼近頭關是夜水陸攻克頭關矣國荃初四日分兵進紮逼近江東橋一帶而自率十八營遁紮雨花臺近處日內

卽當深溝高壘先爲自固之計俟援賊到時穩紮穩打仍依水面爲糧路當能立定脚跟耳征勦大地必須兵多乃能勝任愉快大將軍掃蕩江北之日必率雄師渡江攻勦金陵老巢家兄擬奏請多李大隊亦來此國荃愚昧無知率師到此相距柳營不遠因戎務羈身不能趨謁理合將南岸情形隨時稟聞並希帥府記室將江北一帶軍情時錫鈞函俾擴聞見是所至禱

與多禮堂

昨奉惠書辱承獎借逾恒感佩曷已事恒舍弟十一日率四千人到此扼紮濱江當江東橋一路十二日弟卽調先駐該處各營進紮雨花臺之南該逆乘我紮營未定城壘各出賊萬數千

人來撲並分數千枝列隊助勢我軍穩立不動惟以鎗礮轟擊該逆數進數退死者甚多弟復派隊分途包抄又令馬隊奮勇衝突該逆力不能支始行退遁我軍亦收隊回營是日自巳至申搏戰甚力弁勇亦受傷近百人十三日弟命各營嚴陣禦備仍於該處築壘業已成功分六營駐紮矣目前穩守一隅當可無慮但合圍攻剿若非大將軍雄師賁臨仰承指揮則弟實未能有把握耳

復蔡瑞菴

頃接來書具悉種切小缸窰有賊搶刦麾下派肆板梭巡足以杜該逆之窺伺百姓感也何如湖水尙屬深又濶頃已函致李

子吾左子雲兩兄請其察看緩急添派舢板入內湖梭巡當可
照辦也頃得李與吾軍門來函狗逆復犯樅陽銳意來援必分
數路猛撲該處已防守嚴密而大小缸密一帶有貴營戈船與
敝軍派去之馬步千人紮鮑家冲當能扼要固守矣至羅謙益
爲人甚好辦團之事且待風聲稍定廉明府接篆後或可舉行
且宜札桐城縣乃可辦理目下尙難遽辦也祈亮之

復趙梅卿

昨得惠簡敬悉台旆安抵古巢已於二十五日開設釐局事當
創始諸費妙籌雖暫時商旅無多久之自必源源而來也曷勝
忭祝國荃二十日率軍渡江克太平府二十一日水師克金柱

關蕪湖東梁諸處現在敝軍進駐周村離金陵四十里擬再進
一日擇地深溝高壘俟多李大兵到此之日乃能會合進剿也
樊惠卿不知何以未來急盼渠到金柱關設局抽釐以濟軍餉
煩催其速到爲荷

復黃南坡

日昨排遞一牋計已呈覽敝軍日來惟以挖濠築壘爲事足以
自固請勿慮念惟各營所領鎗礮已歷多年在安慶所領換者
日日施放轟擊又不堪用矣昨經查驗多應更換現在安紫老
營與將來合圍攻剿全恃鎗礮以爲攻守之具吾叟利濟敝軍
凡有所求莫不如響斯應謹備文咨呈冰案伏乞迅賜飭發抬

鎗五百桿小鎗一千二百桿卽日委員徑解金陵大營使敵軍各老營得以更換一次鎗礮以利攻剿之用感荷厚愛曷其有極

與李少山

別後又旬日矣弟前收秣陵關降卒已立爲順字營昨又收投誠四百餘人實因該降卒等真心效順且欲藉以歆動城賊之心易於解散惟日需發給錢文以資食用爲數甚鉅現在已有接濟不及之勢應請貴臺將所收各處釐錢暫勿發給各營專解敵軍以濟新收降卒口糧之用蓋各營需錢尙少而降卒嗷嗷待哺需用更殷故不得不移緩就急也舍弟率湘恒等營共

四千人來此紮江東橋一路十二日弟令八營進紮雨花臺東南隅城壘共出賊萬餘與我力爭惡戰半日斃賊甚眾十三日出賊猶多我軍穩擊穩紮已將新壘築成分八營駐紮該處矣東局所解之米已到否請催其星速解來至盼至盼

致李希菴

日前曾備公牘計已馳呈昨奉初二日鈞函狗逆就縛而潘閭猶思負隅得麾下密爲料理則彼亦檻中之獸耳日來城壘諸賊未敢出窺我軍惟穩慎自固以待大兵齊集再謀合圍之計目下但求站定腳根庶援賊麇至之日不至爲所撼動斯亦足矣多帥來書稱以川豫匪徒分道犯陝羽書告急已分所部十

營命雷鎮率以赴援矣則除畱守廬郡外携軍過江而會勦金陵者想亦不滿萬人矣尙不知能遽來否也湖州竟已不守趙公獨有千古竊意賊之援金陵者必多且速當磨劍以待殲其精銳方足以稍抒其憤而快其報也

復趙玉班

昨委員陳棟回接奉大移並鞍轡五十副均經點收謹已另文咨復冰案廿七日惠牋及藍都司所解馬匹月內想亦可到惟以瑣事瀆費清神其解送煩難誠有如明諭所云者以此益見關拂之切照料之周感佩曷旣敵軍自十二三日迭勝之後城賊踰伏不出援賊亦尙無消息然未敢稍自弛懈諄飭各營修

築濠壘以固根本養蓄精銳以備戰鬥慎之又慎當不爲所搖
撼耳二十三日兩營馬隊在朱門地方竟抄殺賊實數百餘人
並斃兩坐轎賊酋我軍僅受傷十一人而已多帥業已全部入
秦救援金陵圍勦尙須另益大兵也麾下銜命赴浙榮行想
在近日常所祝早平浙亂速來金陵擒渠魁以伸天討瞻望無旣
致喬鶴儕

日前曾寄寸牋不識已登掌記否弟廿三日聞朱門地方有賊
焚掠令馬隊二營馳往抄殺實斃賊四百有奇並斃賊酋二名
差快人意昨據探報僞忠王分大股賊眾自蘇來援金陵老巢
其頭隊已過丹陽到此其中隊後隊亦不久可至弟已飭各營

養精蓄銳穩靜俟之當無他慮惟敝軍勇夫幾三萬人欠餉已三百日點金無術焦灼彌深竊維兩淮之鹽爲東南之大利前因江路多梗利權盡失邇來濱江惟九洑洲一路有一賊壘其餘幸已肅清卽九伏洲之壘亦爲李良臣軍門派所部圍住商船似勉強可以暢行若能從上游招商赴下游運鹽上行到處銷售就中徵收鹽稅則裨益於軍儲非小閣下主持鹺政有管晏富國之才鴻籌妙畫必已熟計其宜未知近日果有富商巨賈就場販鹽否權稅可歸畫一否能設法分潤鉅萬鹽引上行以濟軍餉否伏乞示知是爲至感弟因敝軍輶饑不堪無可設法全賴同州之濟庶免後來饑潰之憂側聞閣下高誼素抱澄

清之志願護東南大局厯有年矣弟謬領一軍近依仁宇倘蒙
勝籌維持設法每季分潤鉅萬鹽引俾得銷售於江皖兩湖引
地卽可以籌出餉項以贍軍實則感戴之忱不可言喻矣

復朱步卿

奉到瑤函欣悉戎幄綏和以忻以頌巢縣之捷賢昆仲勳績懋
昭國家酬庸之典自當先及勞臣廼辱藻詞致謝鄙人讀之
增慙僕幸與斯役蒙聖恩交部議敘已屬非分之榮自愧德
薄能鮮有負旬宣之職何敢妄希撫綏之任耶來函稱賀殊多
溢美之詞愧忤曷極僕初四日率各營進紮雨花臺畔初十日
調湘恒等營紮濱江一路十二日請副後長勝嘉字吉後等營

紮東南隅入舊濠之前城賊壘賊出萬餘人鏖戰半日均經各營奮力擊退賊大敗入壘十三日出賊更多但未敢猛撲近前各營穩紮駐守儘可放心現在援賊尙無遽至之信我軍惟深溝高壘修濬前後濠以待各處大軍來合圍耳知念奉聞

復劉潔齋

昨日接到來函知賑發大通與三山夾各難民之米及青石兩邑之耕牛均經辦有頭緒慰甚慰甚一俟辦齊再行報銷敝處可也至於羅致地紳捐錢辦米運至青陽設局平糶一層但求有實惠及於百姓煩賢友卽放手妥協辦理卽貼用二三千祇要能濟民之饑餓僕亦願爲也僕於前月率師分兩路進規金

陵初一日派隊奪得秣陵關初二夜克大勝關三汊河兩石壘
初三夜克頭關石壘現已進兵逼紫南門外之雨花臺及西門
外之江東橋矣日內深溝高壘援賊之來必能穩紮穩打可以
放心至於合圍則必待多李大軍到日乃可辦到僕兵單尙祇
圍得一半耳

復魏柳南

前接沈中丞來信欣知已令賢友權攝上高正擬函賀接來書
並魏貳尹銘解到蕪湖厚熟米壹千貳百石具費清神感謝之
至承惠貺多珍本擬奉璧恐却之涉於不恭是以均拜登也謝
謝但以僕與左右十年道義之交患難與共農夕相親自未能

須臾相忘若以尋常之氣誼相待務爲投贈聯絡之情則反不免客氣矣以後幸勿再施爲感魏貳尹沉寶明幹畱之在營刻下賢友已將釐務交算否榮赴新任否念念上高雖經兵燹之餘得賢者治之民困自有蘇息之時所望恪守清慎勤三字出之以至公繼之以無倦日日振作精神本無私無欲之剛興養民教民之政視斯民爲一體仍恩威之並施則積弊可除而地方之利可興矣瞻望循聲彌殷禱祝此間自十二三大勝之後三十三日有朱門之捷二十九日復派隊於馬村殺賊百餘人刻下蘇常來援之賊已到頭隊四五萬人尙未近濠猛撲聞僞忠王辦中隊後隊亦六七月可到現在西南兩面長濠均已告

竣各營均準備嚴密可以穩站無虞城賊壘賊於初六日出數千人護來援各賊酋多用洋鎗逼近前濠窺伺我軍濠壘形勢我軍以鎗礮轟之賊卽遁矣日內賊雖常出少許未敢近濠我軍擬先示之以弱俟其大隊猛撲之時然後奮力擊之庶可多損賊中精銳耳

復朱堯階

久疏箋敬實以軍事倥傯馳驅未遑諒蒙原宥昨接手教獎飾殷殷展誦之餘實滋慙赧僕自春間進兵以來均託順利五月初四日進薄金陵城下安置老營於雨花臺一帶事恒舍弟則駐江東橋也修築前後長濠惟金陵城垣極大我軍共祇二萬

人尙未能圍住一半前月十二三城賊屢次出犯均經擊退六月初間蘇杭來援之賊麇至初六初十等日該逆出隊窺伺長濠經我軍以鎗礮擊之卽遁十六日城賊援賊齊出大隊分數十枝猛撲濠壘經各營初則憑濠以鎗礮穩擊繼則派奮勇出濠痛剿殺斃礮斃之賊約二千人並斃僞對王一名及小頭目數十名傷賊尤多稍快人意二十一二等日此間大雨如注濠壘坍塌甚多現在趕緊修築以利戰守鮑軍於十五日克復甯郡或可速來金陵共圖剿辦至於克復之期則非急切所能望耳

與萬簾軒

或行至大通乃完似於下游各局釐務有礙第以繳票不若驗票之更周以後宜飭令各局不必令商民繳下游各局之票而令其必須驗下游各局之票如無票可驗則飭其補完於大通局爲妙蓋大通乃銷鹽之碼頭故猾商欲在此賣鹽亦不漏釐也弟是以咨達冰案並稟懇督轅如奉批准飭安慶大通荻港金柱關四處釐局凡遇商民鹽船上行均應照驗下關完釐之票則於下游各釐局實有裨益但此層辦法尙乞俯賜察核面

稟督憲施行深爲公便

復隋龍淵

頃誦惠章並另文轉解子藥各項均已如數驗收瑣費清神可勝感謝惟餉項支絀則祇有仍仗財神大施法力若阿彌陀佛但知垂眉合掌不似財神之猶有金鞭可借也閣下以爲然否少山兄初一夜在運漕被游勇刦搶今移泊蕪湖與水師緊相依護可以放心矣大通局二十九夜被刦銀三千餘兩之多幸已獲犯究出青陽之菊花山等處立有山寨且有礮火馬匹鄙意必痛加剋洗將該犯等概行正法方足以稍示儆戒而安商賈行旅之人然大通局員不早解餉致有三千餘兩之失倘若

早解濟軍中之急則可免失此鉅款矣此間援賊雖到有數萬昨日賊以數百人嘗我我軍用鎗礮擊之遂退聞忠逆亦不久可到或者有幾次大戰弟已飭各營將士穩穩站定祇要腳根有力不怕他來衝我也日來迭獲陣雨惟土脈總未潤透不知尚有滂沱之澤否安慶求雨卽得誠爲可喜米價想日益減也

復羅旋吉

頃接瑤函知有溧水李榮升等四名託人在貴營說合投誠此事甚好但溧水大酋一爲梁姓一爲高姓共萬餘人前已有稟來此敝處回諭令其暫勿動作俟大軍到日再出城歸順可保不殺茲來示令其將礮船拖過刻下正楊七麻竄踞東壩之時

恐難行也此間自十六日大戰獲勝之後城賊援賊均未再出據探報二十日添賊八千餘人有云卽係甯郡竄來者雄黃鎮紮賊四萬餘人已有半月係蘇常來援者均未近前與我軍挑戰因隔兩小河無橋無船卽我軍亦不便往擊也頃接鮑軍門來緘甯國於十五日克復若鮑公能來此會勦實爲大妙不知能如鄙願否此間今日大雨洗滌煩烝爽快之至想金柱關一帶早得透雨霑足矣

致沈幼丹

二十日肅寄寸牋計可馳呈籤掌左帥進薄衢州劉竺汀率三千人爲之後勁而薌軍已得巨餉入浙必速相與戮力浙事其

有瘳乎卽信境邊防益固更可無煩盡慮矣敝軍自十六日戰勝之後加意嚴防因連日大雨濠牆坍塌十之六七賊思抵隙蹈瑕乘機狂逞二十四夜四更果出大隊偃旂息鼓分路來撲西南一路則皆伏於猛惠公敬等營之前濠東南一路則皆伏於副後南後各營盤並分枝包過長勝等營之後濠天初明時各路賊均猛撲近前經各營憑濠以鎗礮擊斃賊無算但見其紛紛拖去而已其撲猛惠及副後等營之兩大枝賊勢更厚子如雨注先鋒悍賊冒死拔取濠外花籬各營初則以鎗礮猛擊繼則挑精銳出卡痛剿賊遂大敗狂奔其先鋒悍賊無一得脫共殺斃五百餘人奪獲旂幟鎗礮刀矛六百餘件自寅至巳

鏖戰四時之久大獲勝仗各路斃賊傷賊實數在二千以外生擒六十餘人我軍受傷不滿五十人陣亡數人有此一戰援賊之勢當益衰矣鮑軍望日克復甯國擒斬甚多惟逆酋楊輔清漏網由東壩竄去 廷寄令鮑軍恢復甯郡之後會圖金陵倘能速來則新穀未登賊中食少人眾攻取或易得手耳滬上有華爾者以島夷內附積官副將願率其所部三千人挾其火器助攻金陵云有必克之道稟懇少荃中丞檄令國荃酌奪以定進止國荃以中國征戰之事無須借助島人鄙棄之將如令其來而不成功徒多一番駕馭之勞卽或幸能成功亦損我中國之威重頃已婉詞謝之矣